


Parkietenbos y vecindario ta puntra y awor kico??



ORANJESTAD(AAN)—Habitanenan di Prikibos y vecindario, ta reacciona riba e situacion cu tin na dump di Parkietenbos, indicando cu pa mas di 50 aña Parkietenbos a sufri cu e Dump di Aruba.

Semper nan a lanta y bay drumi cu huma stinki di e open landfill aki.

E dump di Parkietenbos ta construi riba rand di baranca banda di lama.

El a carga, na un manera descontrola, e sushi di full Aruba pa mas di 50 aña.

Dilanti di dje tin casnan di vivienda y na banda e ta rondona door di un plantacion grandi ecologico di mangel cu ta biba den awanan di lama.

Nos tur sa cu e dump pa falta di espacio a sigui crece te bira un sero halto di sushi di añanan. Sinembargo mas o menos 3 aña pasa a bin speranza den firmamento.

E gobierno actual a tuma e paso grandi di enfrente e problema di e dump incontra y yen aki.

A traha un plan di accion pa soluciona e problema grandi aki.

Pa mas di 50 aña tur sushi a wordo tira unda cu ta riba dump, na un forma descontrola pues.

Treciendo cun'e e peliger di contaminacion di asbest, afval di laboratorio,

productonan di Lago y radio-actividad etc, etc.

E tabata hopi dificil pa por a trace e camindanan exacto kico tabata dera y na unda.

E ministro di Salubridad Publico a bin cu un plan pa sana e dump.

E promer paso cu lo a bin ta paga e candela permanente cu e pueblo semper a sufri cun'e.

Traha 4 cel den e plantacion di mangrove den lama. Den e celnan aki lo bay tira sushinan na un manera controla.

E celnan aki lo ta completamente safe pa e laman y ala vez lo por carga sushi pa un otro 25 aña mas.

E situacion real:

Sinembargo nos tin entendi cu e sushinan ta wordo tira den e celnan descontroladamente maske na porta nan ta wordo dividi.

E 4 celnan practicamente ya a cera na otro y ta yena te na rand.

Waak potret adjunto. E programa di sanacion di Dump di Parkietenbos tambe lo a encera reciclahe y un incenerator chiquito pa desperdicionan di laboratorio y hospital.

Tambe a wordo treci e tempo ey dilanti cu e peso di e sushi mes lo sirbi di proteccion pa no laga e liquido di e sushi sijpel bay den lama.

Den e plan original tabata tin un plastique (liner) aden cu lo percura pa protega nos lama di contaminacion.

A kita e liner for di e plan y a bisa cu e no lo ta necesario mas.

Sinembargo ta hopi biaha e hendenan cu ta biba den vecindario di Parkietenbos sa mira plasnan preto di sushi liquido cu a siipel bay door di e murayanan di tera di e celnan, ta drief bay pabao cu tur su consecuencianan pa nos beachnan.

E celnan no por a cumpli cu nan capacidad di carga, mas ainda, door di cu awor sushi no ta wordo kima mas.

Treciendo 90% mas cantidad di sushi cu promer aya.

E reciclahe cu tambe lo por a yuda e cantidad di sushi baha, tampoco a bin na vigor.

Nos tambe sa cu ya pa 15 aña a existi un otro dump na Palo Marga pa no menciona tur e otro dumpnan ilegal na varios parti di nos isla.

Awor nos a lesa cu a cera e dump di Palo Marga y a paga e candela. Nos pregunta grandi ta: 'y awor kico??'.

Esey kiermeen cu Parkietenbos lo bay haya tur e sushi extra aki, cu antes tabata dump na Palo Marga tambe?

Esey kiermeen cu nos lo mester bai custumbra atrobe cu e eterno holoran stinki y huma malo di candela? Nos no ta compronde di con ta concentra e operacion di dump na Aruba na Parkietenbos.

Nos mes ta waak cu nos wowonan y nos sentido comun ta muestra nos cu Parkietenbos ta yen caba.

Nos no por permiti pa sigui traha celnan den lama. Ta tristo pa constata cu no tin maneho sostenible ainda pa cu e problema di sushi na Aruba.

Ki dia lo bay tin e boluntad politico pa traha riba e



problema di sushi na un manera profesional?

Ta mira Aruba como un pais moderno y up to date? Tur e miyones cu a wordo inverti den e forsamento pa expande e dump bieu di Parkietenbos den awanan di lama, tabata envano.

E celnan ta un peliger pa nos medio ambiente, nos lama y nos beachnan cu ya ta hopi sushi caba.

E dump ilegal na Palo Marga tampoco ta cuadra cu e construccion y reglamento di medio ambiente profesional necesario.

E pueblo di Savaneta tambe a protesta.

Nada a pasa!

Gobierno no a bin cu un contra-proposicion.

Pesey Parkietenbos ta puntra 'Y awor kico?'.

E habitantenan di Parkietenbos mester bay bek den tempo y bira e victima atrobe????

Parkietenbos kier trece diferente sugerencia.

Den un intento pa duna un aporte na un maneho sano di proceso di sushi na Aruba nos kier trece diferente sugerencia dilanti.

Algun di e sugerencianan aki ta parti di e plan original pa e dump, pero nunca mas a

tende nada di nan.

Un punto importante ta busca un localidad apropiada cu mas espacio, y nunca cerca di laman pa traha un Dump nobo, segun normanan internacional di desperdicio como tanto otro paisnan moderno tin. Otro punto clave ta pa bin cu un maneho nacional di reciclahe.

Esaki ta e caso den mayoria paisnan desaroya.

Asina ta importante pa introduci un curiculo di reciclahe na schoolnan.

Tambe mester duna atencion na separacion di sushi comercial, y tambe na cas. Separa tur sorto di articulo, no solamente koper, auto y tirenan bieu.

Separa tambe papel, botter, grof vuil di construccion, bleki etc.

Bende esakinan y asina trece placa aden cu por inverti den proyectonan informativo di reciclahe pa nos comunidad completo.

Riba e potretnan adhunto por mira e celnan traha den mangrove 2 aña pasa y e celnan awor cu mas bien a bira un solo cel full yen.

TELEFONAN DI DIARIO
582-6747- FAX 582-8551